



Deddfwriaeth Diogelu Data

Dogfen Bolisi Briodol

Polisi ar Brosesu Data Sensitif at Ddibenion
Gorfodi'r Gyfraith, o dan Ran 3 o Ddeddf Diogelu
Data 2018

System Adnabod Wyneb a Adnabod Wyneb a
Gychwynnir gan Weithredwr (OIFR) Heddlu De
Cymru / Heddlu Gwent

Prosesu data biometrig er mwyn adnabod unigolyn
yn benodol.

Medi 2021

Fersiwn 2.0

Rheoli Fersiynau

Fersiwn	Dyddiad	Awdur	Pwrpas
V1.0	01/07/19	S.Lloyd	Drafft Gwreiddiol
V1.1	12/08/19	S.Lloyd	Mân Ddiwygiadau
V1.2	14/08/19	S.Lloyd	Fformat Swyddfa'r

			Comisiynydd Gwybodaeth
V1.3	05/02/20	S.Lloyd	Rheoli Fersiynau
V1.4	10/02/20	D.Howe	Adolygwyd
V1.5	17/02/20	S.Lloyd	Adolygwyd
V1.6	01/04/20	S.Lloyd	Adolygwyd
V1.7	29/06/20	S.Lloyd	Diwygiadau Cyfreithiol
V1.8	24/08/20	S.Lloyd	Adolygiad y Swyddog Diogelu Data
V1.9	08/07/21	S.Lloyd	Adolygiad yr Uwch-Swyddog Cyfrifol
V2.0	17/09/21	S.Lloyd	Terminoleg Genedlaethol

Termau a Diffiniadau: Bydd i dermau mewn priflythrennau a ddefnyddir yn y Ddogfen Bolisi Briodol hon yr ystyr a roddir iddynt yn adran 3 o'r Ddogfen Bolisi ar gyfer OIFR oni chânt eu diffinio fel arall.

Cyflwyniad

Paratowyd y ddogfen bolisi hon yn unol â rhwymedigaethau Heddlu De Cymru/Heddlu Gwent o dan Ran 3 o Ddeddf Diogelu Data 2018. Dylid ei darllen ochr yn ochr â Chofnod o Weithgareddau Prosesu Heddlu De Cymru/Heddlu Gwent (a gynhelir yn unol ag [Erthygl 30 o'r Rheoliad Cyffredinol ar Ddiogelu Data ac adran 61 o Ddeddf Diogelu Data 2018](#)) a [Siarter Gwybodaeth Bersonol](#) Heddlu De Cymru/Heddlu Gwent. Ceir polisi diogelu data sy'n ymwneud yn benodol ag OIFR hefyd yn y Weithdrefn Weithredu Safonol a'r Aseiad o'r Effaith ar Ddiogelu Data a Rhan 2 o Ddeddf Diogelu Data 2018 ac Erthygl 9 o'r Rheoliad Cyffredinol ar Ddiogelu Data.

Mae adrannau 35(3), 35(5)(c) a 42 o Ran 3 o Ddeddf Diogelu Data 2018 yn nodi'r gofyniad i Ddogfen Bolisi Briodol fod ar waith wrth brosesu data personol sensitif at ddibenion Gorfodi'r Gyfraith.

Diffinnir prosesu sensitif yn Rhan 3 adran 35(8) ac mae'n cyfateb i ddata categori arbennig o dan y Rheoliad Cyffredinol ar Ddiogelu Data. Mae gweithgareddau prosesu data sensitif yn cynnwys: -

- a) prosesu data personol sy'n datgelu tarddiad hiliol neu ethnig, safbwyntiau gwleidyddol, credoau crefyddol neu athronyddol neu aelodaeth o undebau llafur;
- b) prosesu data genetig, neu ddata biometrig, at ddiben adnabod unigolyn yn benodol;

- c) prosesu data sy'n ymwneud ag iechyd;
- d) prosesu data sy'n ymwneud â bywyd rhywiol neu gyfeiriadedd rhywiol.

Mae'n rhaid i weithgareddau prosesu data at ddibenion gorfodi'r gyfraith gydymffurfio â'r egwyddorion diogelu data a amlinellir yn Rhan 3 o Ddeddf Diogelu Data 2018. Yn benodol, mae'r egwyddor diogelu data gyntaf (adran 35) yn nodi bod yn rhaid i weithgareddau prosesu at ddibenion gorfodi'r gyfraith fod yn gyfreithlon ac yn deg. Yn ogystal, dim ond os oes gennych Ddogfen Bolisi Briodol ac os yw'r gweithgarwch prosesu yn bodloni'r amodau canlynol y cewch brosesu data personol sensitif at ddibenion gorfodi'r gyfraith: -

- mae'r gweithgarwch yn seiliedig ar gydsyniad testun y data - gweler adran 35(4);

neu
- mae'r gweithgarwch yn gwbl angenrheidiol at ddiben gorfodi'r gyfraith ac yn seiliedig ar un o'r amodau yn Atodlen 8 - adran 35(5).

Y Ddogfen Bolisi hon

Bydd y ddogfen hon yn dangos bod gweithgareddau prosesu data sensitif yn gydymffurfio â'r gofynion yn Rhan 3 adran 42 o Ddeddf Diogelu Data 2018.

Disgrifiad o'r Data a Brosesir

Y data sensitif a brosesir drwy ddefnyddio Technoleg Adnabod Wynebau a Gychwynnir gan Weithredwr (OIFR) yw:

- Data biometig er mwyn adnabod unigolyn yn benodol.

Adnabod Wynebau a Gychwynnir gan Weithredwr

Y defnydd o dechnoleg adnabod wynebau pan fo:

- (i) cyfryngau yn cael eu cofnodi'n uniongyrchol o Destun sy'n bresennol; neu
- (ii) cyfryngau yn cael eu caffael fel arall yn lle eu cofnodi,

gyda'r bwriad o'u dadansoddi drwy ddefnyddio'r system technoleg adnabod wynebau. Gallai canlyniadau proses ddadansoddi o'r fath ddylanwadu ar ddigwyddiadau y mae'r ffilm yn ymwneud â nhw mewn amser real.

Y defnydd o dechnoleg adnabod wynebau a gychwynnir gan weithredwr sy'n cofnodi delwedd o berson penodol ac yn ei defnyddio i naill ai (i) helpu'r heddlu i ganfod pwy

yw person yn y ddelwedd neu (i) cadarnhau ble mae person wedi ymddangos o'r blaen mewn cyfryngau eraill a ddelir gan yr heddlu.

Yn Heddlu De Cymru/Heddlu Gwent, mae hyn yn cynnwys defnyddio technoleg adnabod wynebâu â ffôn symudol (Dyfais OIFR) sy'n cymharu ffotograff o wyneb person a dynnwyd ar ffôn symudol sy'n cael ei brosesu i greu Templed Biometrig sydd wedyn yn cael ei gymharu â'r Templed Biometrig o ddelweddau sydd yn y Gronfa Ddata/Cronfeydd Data Cyfeirio Delweddau er mwyn helpu swyddog i adnabod Testun.

Ystyrir bod data biometrig a ddefnyddir i adnabod unigolyn yn benodol yn ddata personol sensitif. At ddiben y gwaith prosesu hwn byddwn yn casglu data personol aelodau o'r cyhoedd a fydd yn cynnwys Delwedd Chwilota a allai gael ei defnyddio drwy dynnu Templed Biometrig ohoni er mwyn eu hadnabod yn benodol. Pan na fydd y data hyn yn cyfateb i'r hyn a ddelir ar y Gronfa Ddata/Cronfeydd Data Cyfeirio Delweddau a bennwyd ymlaen llaw ni fydd yn cael eu prosesu ymhellach a bydd yn cael eu dileu'n barhaol. Ni chesglir unrhyw ddynodyddion personol eraill yn ychwanegol at y Templed Biometrig.

Nid yw Heddlu De Cymru/Heddlu Gwent yn dibynnu ar gydsyniad i brosesu.

Amodau ar gyfer prosesu data sensitif.

Mae nifer o amodau perthnasol yn Atodlen 8 a fydd yn gymwys ar gyfer defnyddio OIFR, sy'n gymwys i arferion plismona presennol sut bynnag:

1. Dibenion statudol ac ati

Bodlonir yr amod hwn os oes angen prosesu'r data—

- (a) er mwyn arfer swyddogaeth a roddir i berson drwy ddeddfiad neu reolaeth y gyfraith,
- (b) bod gwneud hynny am resymau sy'n ymwneud â budd sylweddol i'r cyhoedd

Mae gan yr heddlu ddyletswydd o dan y gyfraith gyffredin i atal a chanfod troseddau: dyma'r 'reolaeth y gyfraith' berthnasol y mae angen prosesu data yn unol â hi er mwyn i'r heddlu arfer ei swyddogaethau. Mae angen prosesu'r data hefyd am resymau sy'n ymwneud â budd sylweddol i'r cyhoedd, hynny yw, er mwyn atal a chanfod troseddau a diogelu'r cyhoedd. Wrth benderfynu a oes angen prosesu data, bydd Heddlu De Cymru/Heddlu Gwent bob amser yn ystyried a ellir defnyddio dulliau llai ymwithiol heb danseilio'r amcan na buddiannau'r unigolyn wedi'u cydbwysu yn erbyn buddiannau'r gymuned.

Amod 1 yw'r prif amod y dibynnir arno. Fodd bynnag, mae amodau eraill yn Atodlen 8 a allai fod yn gymwys hefyd, sef:

2. Gweinyddu cyfiawnder

Bodlonir yr amod os oes angen prosesu'r data er mwyn gweinyddu cyfiawnder.

E.e. Adnabod unigolion sy'n osgoi cyfiawnder ar ôl cyflawni trosedd neu sy'n ymyrryd â'r gwaith o weinyddu cyfiawnder

3. Diogelu buddiannau allweddol i fywyd unigolyn

Bodlonir yr amod hwn os oes angen prosesu'r data er mwyn diogelu buddiannau allweddol i fywyd testun y data neu unigolyn arall.

E.e. Os bydd unigolyn yn anymwybodol neu os bydd angen prosesu'r data er mwyn asesu'r perygl uniongyrchol i swyddogion neu unigolion eraill drwy gadarnhau a oes hanes hysbys o drais.

4. Diogelu plant ac unigolion sy'n wynebu risg

Bodlonir yr amod hwn-

(a) os oes angen prosesu'r data er mwyn-

(i) diogelu unigolyn rhag esgeulustod neu niwed corfforol, meddyliol neu emosiynol, neu

(ii) diogelu llesiant corfforol, meddyliol neu emosiynol unigolyn,

(b) os yw'r unigolyn-

(i) o dan 18 oed, neu

(ii) yn 18 oed neu drosodd ac yn wynebu risg,

(c) os yw'r data yn cael eu prosesu heb gydsyniad testun y data am un o'r rhesymau a restrir yn is-baragraff (2)

(d) os oes angen prosesu'r data am resymau sy'n ymwneud â budd sylweddol i'r cyhoedd.

Gweler Deddf Diogelu Data 2018 am ddarpariaethau llawn yr amod hwn.

E.e. prosesu delweddau o unigolion y credir eu bod yn unigolion coll.

8. Atal twyll

(1) Bodlonir yr amod hwn-

(a) os oes angen prosesu'r data er mwyn atal twyll neu fath penodol o dwyll, a

(b) bod hynny'n cynnwys-

(i) datgelu data personol gan awdurdod cymwys fel aelod o sefydliad gwrth-dwyll,

(ii) datgelu data personol gan awdurdod cymwys yn unol â threfniadau a wnaed gan sefydliad gwrth-dwyll, neu

(iii) prosesu data personol a ddatgelwyd fel y disgrifir yn is-baragraff (i) neu (ii).

(2) Yn y paragraff hwn, mae i “sefydliad gwrth-dwyll” yr un ystyr ag a roddir iddo yn adran 68 o Ddeddf Troseddau Difrifol 2007.

E.e. prosesu delweddau ar gyfer unigolion yr amheuir eu bod wedi cyflawni twyll.

Gweithdrefnau ar gyfer sicrhau cydymffurfiaeth ag egwyddorion Deddf Diogelu Data 2018

Egwyddor Atebolrwydd

Mae Heddlu De Cymru/Heddlu Gwent wedi rhoi mesurau technegol a sefydliadol priodol ar waith er mwyn bodloni gofynion atebolrwydd a dangos cydymffurfiaeth â gofynion ehangach Rhan 3 o Ddeddf Diogelu Data 2018 ac, yn benodol, yr egwyddorion. Mae'r rhain yn cynnwys: -

- Penodi swyddog diogelu data sy'n gyfrifol am sicrhau cydymffurfiaeth â deddfwriaeth diogelu data ar gyfer OIFR; sy'n atebol yn uniongyrchol i dîm y Prif Swyddog ar gyfer Heddlu De Cymru/Heddlu Gwent.
- Mabwysiadu dull 'diogelu data'n fwriadol ac yn ddiodyfyn' wrth gynnal ein gweithgareddau.
- Cadw dogfennaeth am ein gweithgarwch prosesu gan gyfeirio'n benodol at adrannau 61 a 62 o Ddeddf Diogelu Data 2018.
- Mabwysiadu a gweithredu polisiau diogelu data a sicrhau bod gennym gontractau ysgrifenedig â'n proseswyr data.
- Rhoi mesurau diogelwch priodol ar waith mewn perthynas â'r data personol a brosesir gennym.
- Cynnal asesiadau o'r effaith ar ddiogelu data ar gyfer ein gweithgareddau prosesu risg uchel.

Rydym yn adolygu ein mesurau atebolrwydd yn rheolaidd ac yn eu diweddarau neu'n eu diwygio pan fo angen.

Egwyddor (1): cyfreithlondeb a thegwch

Rhaid i weithgarwch prosesu data personol fod yn gyfreithlon ac yn deg. Mae ond yn gyfreithlon os yw'n seiliedig ar y gyfraith ac i'r graddau y mae'n seiliedig arni a naill ai bod testun y data wedi cydsynio i'r data gael eu prosesu neu fod angen prosesu'r data er mwyn cyflawni tasg a gyflawnir at y diben hwnnw gan Heddlu De Cymru/Heddlu Gwent fel awdurdodau cymwys. Gan fod OIFR yn cynnwys prosesu data sensitif, a hefyd, yn absenoldeb cydsyniad, nid yw ond yn gyfreithlon os yw'r gwaith prosesu hwnnw yn gwbl angenrheidiol at ddiben gorfodi'r gyfraith a bod y gwaith prosesu yn bodloni o leiaf un o'r amodau yn Atodlen 8 a bod Heddlu De Cymru/Heddlu Gwent wedi rhoi'r Ddodfen Bolisi Briodol hon ar waith.

Rydym yn darparu gwybodaeth glir a thryloyw am y rhesymau pam rydym yn prosesu data personol, gan gynnwys ein sail gyfreithlon dros brosesu yn ein hysbysiad preifatrwydd, yn yr hysbysiad preifatrwydd staff a'r ddogfen bolisi hon. Mae'r asesiad o'r effaith ar ddiogelu data ar gyfer OIFR yn rhoi manylion penodol am y ffordd y caiff data eu prosesu a sut mae'r mesurau rydym wedi'u rhoi ar waith yn sicrhau bod y gweithgareddau prosesu'n gyfreithlon, yn deg ac yn dryloyw. Mae dogfennaeth berthnasol a gwybodaeth ychwanegol am y ffordd y defnyddir OIFR ar gael i'r cyhoedd yn [Hafan | Heddlu De Cymru \(south-wales.police.uk\)](https://www.south-wales.police.uk).

Mae prosesu data drwy ddefnyddio OIFR yn gwbl angenrheidiol er mwyn arfer swyddogaethau Heddlu De Cymru/Heddlu Gwent i atal a chanfod troseddau a diogelu'r cyhoedd am resymau sy'n ymwneud â budd sylweddol i'r cyhoedd (gweler uchod o dan **Amodau ar gyfer prosesu data sensitif**). Dibynnir yn bennaf ar amod 1 yn Atodlen 8, ond gallai amodau 2, 3, 4 a/neu 8 hefyd fod yn gymwys. Rydym wedi rhoi enghreifftiau lle y gallai hyn fod yn wir uchod. Bydd Heddlu De Cymru/Heddlu Gwent bob amser yn ystyried a oes gwir angen defnyddio OIFR (h.y. o ystyried mesurau eraill nad ydynt yn golygu prosesu data sensitif ac a ellid sicrhau'r un canlyniad) a byddant yn sicrhau bod o leiaf un amod perthnasol yn cael ei fodloni.

Egwyddor (2): cyfyngiadau o ran dibenion

Dibenion gorfodi'r gyfraith Heddlu De Cymru/Heddlu Gwent ar gyfer prosesu drwy ddefnyddio OIFR yw atal, canfod ac erlyn troseddau ac ymchwilio iddynt yn bennaf ond maent hefyd yn cynnwys diogelu rhag bygythiadau i ddiogelwch y cyhoedd a'u hatal. Mae'r rhain i gyd yn ddibenion gorfodi'r gyfraith o dan adran 31 o Ddeddf Diogelu Data 2018.

Bob tro y defnyddir OIFR, caiff y diben gorfodi'r gyfraith penodol a dilys perthnasol ei gofnodi'n glir.

Rydym yn prosesu data sensitif gan ddefnyddio OIFR pan fo angen i ni wneud hynny er mwyn cyflawni'r swyddogaethau statudol hyn a restrir uchod er budd sylweddol i'r cyhoedd, gan gynnwys pan fo angen gwneud hynny er mwyn cydymffurfio â gofyniad rheoleiddiol neu helpu corff arall i gydymffurfio â gofyniad o'r fath, cadarnhau a oes rhywun wedi ymddwyn mewn ffordd anghyfreithlon neu amhriodol, diogelu'r cyhoedd rhag anonestrwydd, atal neu ganfod gweithredoedd anghyfreithlon neu ddatgelu gwybodaeth i gynrychiolwyr etholedig. Enghraifft o hyn fyddai os amheuir bod unigolyn yn cyflawni trosedd.

Rydym wedi'n hawdurdodi'n gyfreithiol i brosesu data personol at y dibenion hyn. Efallai y byddwn yn prosesu data personol a gasglwyd at un o'r dibenion hyn (gennym ni neu reolydd arall), at unrhyw un o'r dibenion gorfodi'r gyfraith a restrir yma, ar yr amod bod y gwaith prosesu yn angenrheidiol ac yn gymesur â'r diben hwnnw. Golyga hyn, yn benodol, ein bod yn ystyried beth rydym yn ceisio ei gyflawni, a oes mesurau amgen na fyddent yn cynnwys prosesu data sensitif ond a fyddai'n cyflawni'r un canlyniadau, fwy neu lai, ac yn cael yr un effaith neu lai o effaith ar unigolion a'r gymuned.

Os byddwn yn rhannu data a gasglwyd at ddibenion gorfodi'r gyfraith â rheolydd arall, byddwn yn dogfennu ei fod wedi'i awdurdodi'n gyfreithiol i brosesu'r data at ei

ddiben gorfodi'r gyfraith a bod y gwaith prosesu yn angenrheidiol ac yn gymesur â'r diben hwnnw.

Ni fyddwn yn prosesu data personol at ddibenion sy'n anghydnaws â'r diben gwreiddiol y'u casglwyd ar ei gyfer.

Ni fyddwn yn prosesu data a gasglwyd at ddiben sy'n ymwneud â gorfodi'r gyfraith at ddiben nad yw'n ddiben sy'n ymwneud â gorfodi'r gyfraith oni fydd y gwaith prosesu wedi'i awdurdodi'n gyfreithiol a'i fod yn bodloni gofynion y Rheoliad Cyffredinol ar Ddiogelu Data a Deddf Diogelu Data 2018.

Egwyddor (3): lleihau data

Rydym yn prosesu data sydd eu hangen at ddiben(ion) gorfodi'r gyfraith perthnasol ac yn sicrhau eu bod yn ddigonol ac yn berthnasol ac nad ydynt yn ormodol mewn perthynas â'r diben(ion) y'u prosesir ar ei gyfer (eu cyfer). Y wybodaeth a brosesir gennym yw'r wybodaeth sydd ei hangen at ein dibenion ac sy'n gymesur â nhw yn unig. Pan roddir data personol i ni neu pan fyddwn yn cael data personol, ond nad ydynt yn berthnasol i'n dibenion datganedig, byddwn yn eu dileu. Enghraifft o hyn fyddai petai delwedd unigolyn arall yn cael ei chasglu na fyddai'n destun ymchwiliad.

At hynny, mae angen i'r data fod o ansawdd derbyniol at ddibenion cymharu e.e. delwedd o wyneb ag o leiaf 50 picsele rhwng llygaid y testun. Yn achos OIFR, mae digon o ddata biometrig wynebol i'w cymharu yn erbyn cronfa ddata. Caiff pob delwedd chwilota ei dileu ar y ddyfais symudol a'r system technoleg adnabod wynebau ar unwaith.

Yn y pen draw, gweithredwr dynol fydd yn penderfynu a oes cyfatebiad rhwng y Ddelwedd Chwilota a Delwedd yr Unigolyn lle mae'r gymhariaeth awtomataidd yn awgrymu mai'r un person sydd dan sylw o bosibl. Mae hwn yn fesur diogelwch ychwanegol er mwyn sicrhau na chaiff unigolion tebyg ond anghywir eu nodi.

Egwyddor (4): cywirdeb

Ni fyddwn yn cadw'r Ddelwedd Chwilota o'r Testun na'r Templed Biometrig am fwy o amser nag sy'n angenrheidiol at y dibenion sy'n ymwneud â gorfodi'r gyfraith y maent yn cael eu prosesu ar eu cyfer. Caiff y Ddelwedd Chwilota ei dileu'n awtomatig ar y Ddyfais OIFT a'r system technoleg adnabod wynebau ar unwaith. Dim ond ychydig o eiliadau y bydd y broses gymharu yn ei gymryd. Os nodir bod cyfatebiad, bydd gweithredwr dynol yn ystyried y delweddau ymhellach. P'un a yw'r swyddog yn penderfynu bod y cyfatebiad yn debyg ond anghywir neu fod cyfatebiad, caiff y ddelwedd ei dileu'n awtomatig ac ar unwaith ar y Ddyfais OIFR a'r system technoleg adnabod wynebau. Pan fyddwn yn dod yn ymwybodol bod data personol a geir mewn Cronfa Ddata Cyfeirio Delweddau yn anghywir neu'n anghyfredol, o ystyried y diben y maent yn cael eu prosesu ar ei gyfer, byddwn yn cymryd pob cam rhesymol i sicrhau y caiff y data hynny eu dileu neu eu cywiro yn ddi-oed. Proses awtomataidd yw hon ac mae'n digwydd bob deg munud. Bydd yn cynnwys cymharu delweddau yn y Gronfa Ddata Cyfeirio Delweddau a delweddau o'r systemau tarddiol. Rhoddir gwerth hash ar bob set o ddelweddau a chânt eu cymharu er cywirdeb er mwyn sicrhau mai'r un unigolyn sydd dan sylw. Os bydd diffyg cydbwysedd caiff rhybudd ei anfon i dîm y gronfa ddata i'w hadolygu. Os byddwn yn

penderfynu peidio â'u dileu na'u cywiro, er enghraifft am fod y sail gyfreithlon rydym yn dibynnu arni i brosesu'r data yn golygu nad yw'r hawliau hyn yn gymwys, byddwn yn dogfennu ein penderfyniad ac yn cymryd camau priodol i hysbysu testun y data. Os byddwn yn dileu neu'n cywiro data personol byddwn yn hysbysu unrhyw dderbynwyr rydym wedi rhannu'r data hynny â nhw. Un mesur diogelu ychwanegol yn y broses yw y bydd swyddog yr heddlu yn ceisio cadarnhau pwy yw'r unigolyn â llaw cyn defnyddio OIFR.

Egwyddor (5): cyfyngiadau storio

Cedwir yr holl ddata sensitif a brosesir gennym at ddiben sy'n ymwneud â gorfodi'r gyfraith am y cyfnodau a nodir yn ein hamserlen cadw. Caiff y Ddelwedd Chwilota o unigolyn, gan gynnwys y Templed Biometrig, ei dileu'n awtomatig ar unwaith. P'un a yw'r swyddog yn penderfynu bod y cyfatebiad yn debyg ond anghywir neu fod cyfatebiad, caiff y ddelwedd ei dileu'n awtomatig ac ar unwaith ar y Ddyfais OIFR a'r system technoleg adnabod wyneb. Rydym yn pennu'r cyfnod cadw ar gyfer y data hyn yn seiliedig ar ein rhwymedigaethau cyfreithiol a'r angen i'w cadw ar gyfer ein hanghenion busnes. Caiff ein hamserlen cadw ei hadolygu'n rheolaidd a'i diweddarau pan fo angen.

Egwyddor (6): uniondeb a chyfrinachedd (diogelwch)

Caiff data personol a brosesir gan OIFR eu prosesu o fewn ein rhwydwaith cyfrifiadurol diogel achrededig a leolir yn lleol yn ardal Heddlu De Cymru/Heddlu Gwent yn unol â pholisïau diogelwch cenedlaethol a lleol. Caiff gwybodaeth copi caled ei phrosesu yn unol â'n polisïau rheoli gwybodaeth. Cymhwysir Polisïau Diogelu Data o ddechrau mentrau er mwyn sicrhau cydymffurfiaeth ddeddfwriaethol â'n rhwymedigaethau diogelu data a phennu lefelau priodol o fesurau diogelwch a rheolaethau technegol a sefydliadol wrth brosesu data personol a data sensitif. Bwriedir i'n holl fesurau diogelwch ddiogelu data rhag cael eu prosesu heb awdurdod neu'n anghyfreithlon, eu colli'n ddamweiniol, eu dinistrio neu eu difrodi.

Mae rheolaethau mynediad priodol ar waith ar gyfer ein systemau electronig a'n storfeydd ffisegol gan gynnwys, er enghraifft, prawf dilysu aml-ffactor i gael mynediad i ddyfeisiau symudol (ar ffurf mewngofnodi lluosog/codau mynediad/systemau adnabod wyneb ac ati), diogelu cyfrineiriau, amgryptio a systemau cloi. Perchenogion Asedau Gwybodaeth sy'n gyfrifol am sicrhau y caiff yr holl brosesau rheoli gwybodaeth eu cymhwyso at wybodaeth a bod cylch parhaus o waith adolygu a phrosesau nodi a rheoli risg gwybodaeth. Mae OIFR hefyd wedi mynd drwy Asesiad cadarn o'r Effaith ar Ddiogelu Data.

Mae'r pob aelod o'r staff yn cael hyfforddiant sylfaenol ar ddiogelu data a rhaid iddynt gael hyfforddiant gorfodol ar reoli gwybodaeth bob blwyddyn. Darperir hyfforddiant penodol i swyddogion sy'n gweithio gydag OIFR, a ategir gan Weithdrefnau Gweithredu Safonol pwrpasol

Mae'r systemau a ddefnyddir gennym i brosesu data personol yn ein galluogi i ymateb i geisiadau unigolion i arfer hawliau a dileu neu ddiweddarau data personol ar unrhyw adeg lle y bo'n briodol. Caiff popeth sy'n digwydd ar systemau gweithredu ei gofnodi mewn log archwilio sy'n golygu bod modd nodi'r cam a gymerwyd, pryd y'i cymerwyd a phwy a'i cymerodd.

Cadw a Dileu

Yn benodol i OIFR a'r system technoleg adnabod wynebau

- Delwedd o'r Testun fel y'i cofnodwyd gan OIFR (Delwedd Chwilota) – sy'n cael ei dileu ar unwaith ar y Ddyfais OIFR a'r system technoleg adnabod wynebau.
- Templed Biometrig o Ddelwedd Chwilota – yn cael ei ddileu ar unwaith yn y system technoleg adnabod wynebau
- Delweddau o Unigolion a'r Templed Biometrig (a ddelir ar y system technoleg adnabod wynebau) – yn dilyn yr un cyfnodau cadw â safonau Rheoli Gwybodaeth yr Heddlu ar gyfer System Rheoli Cofnodion Niche

Llyfr Nodiadau Poced Electronig

- Llyfr Nodiadau Poced Electronig – cyfnod cadw gwybodaeth bersonol yn unol â safonau Rheoli Gwybodaeth yr Heddlu (a nodir yn fanwl yn yr Adolygiad o'r Effaith ar Ddiogelu Data mewn perthynas â'r Llyfr Nodiadau Poced Electronig), heb gynnwys y Ddelwedd Chwilota.

System Ffynhonnell – Lluniau a dynnwyd yn y Ddalfa a Lluniau o Unigolion Coll

Gweler y ddogfen 'Review of the Use and Retention of Custody Images', a gyhoeddwyd gan y Swyddfa Gartref ym mis Chwefror 2017 (argymhelliad 4)

Dim euogfarn – ar gais

Grŵp 1 neu 2 (Materion Diogelu'r Cyhoedd a throseddau rhywiol a threisgar a throseddau difrifol eraill yn y drefn honno) – 10 mlynedd ar gais ac wedyn adolygiad

Grŵp 3 (pob trosedd arall) – 6 blynedd ar gais ac wedyn adolygiad

Grŵp 4 (unigolion coll) – 6 blynedd wedyn adolygiad

Caiff yr holl ddata personol eraill eu storio yn unol â safonau Rheoli Gwybodaeth yr Heddlu.

Grŵp 1 – y testun yn 100 oed wedyn adolygiad

Grŵp 2 – cyfnod clir o 10 mlynedd wedyn adolygiad

Grŵp 3 – cyfnod clir o 6 blynedd

Grŵp 4 (unigolion coll) – 6 blynedd wedyn adolygiad

Dyddiad adolygu'r Ddogfen Bolisi Briodol

Cedwir y polisi hwn tra bydd ein gwaith prosesu yn mynd rhagddo ac am o leiaf 6 chwe mis ar ôl i'n gwaith prosesu ddod i ben.

Caiff y polisi hwn ei adolygu bob blwyddyn neu ei ddiwygio'n amlach os bydd angen.

Ystyrir yr holl wybodaeth a chanllawiau rheoleiddio a phlisma, cyfraith achosion berthnasol a newidiadau i ddeddfwriaeth.

Cyhoeddir copi o'r polisi hwn ar wefan Heddlu De Cymru/Heddlu Gwent ac mae copi ar gael i'r Comisiynydd Gwybodaeth, ar gais, am ddim yn unol ag adran 42(3)(cc) o Ddeddf Diogelu Data 2018.


Ceir rhagor o wybodaeth am y ffordd y mae Heddlu De Cymru/Heddlu Gwent yn defnyddio OIFR mewn dogfennau ategol perthnasol hefyd, gan gynnwys: -

- Gweithdrefnau Gweithredu Safonol OIFR – Canllaw i swyddogion
- Dogfen Bolisi OIFR
- Asesiad o Effaith OIFR ar Gydraddoldeb
- Gweithdrefnau Gweithredu Safonol iPatrol – Canllaw i swyddogion, gan gynnwys y Llyfr Nodiadau Poced Electronig
- Asesiad o Effaith OIFR ar Ddiogelu Data
- Asesiad o'r Effaith ar Ddiogelu Data iPatrol

Nodir isod bolisiau/dogfennau canllaw perthnasol eraill sydd ar gael i bersonél yr heddlu:

Gwybodaeth am Ddiogelwch Gwybodaeth
Polisi Diogelu Data
Canllaw ar Asesu'r Effaith ar Ddiogelu Data
Canllawiau ar Reoli Asedau Gwybodaeth
Llawlyfr i Berchenogion Asedau Gwybodaeth
Canllawiau ar Reoli Risg Gwybodaeth
Canllawiau ar Leihau Data, Anonymeiddio a Defnyddio Ffugenwau
Canllawiau ar Gydsyniad
Amserlen Cadw'r Heddlu

Cymeradwyo'r Ddogfen Bolisi

Y sawl a gwblhaodd y Ddogfen Bolisi Briodol	Enw (mewn priflythrennau)	Scott Lloyd Prif Arolygydd
	Dyddiad:	08/07/2021
Swyddog Diogelu Data	Enw:	Louise Voisey
	Dyddiad:	20/08/2020
Llofnod Cymeradwyo (Bydd angen cael cymeradwyaeth naill ai'r Uwch-Swyddog Cyfrifol/y Perchennog Asedau	Llofnodwyd:	

Gwybodaeth neu Bennaeth yr Uned)		
	Enw (mewn priflythrennau)	Mark Travis Prif Gwnstabl Cynorthwyol
	Dyddiad:	08/07/2021